



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

SVIM MEDIJIMA!

04.04.2017

SAOPŠTENJE 0211-43-811-1/17

Osam vijećnika koji čine opoziciju u Općinskom vijeću Bosanski Petrovac, a predstavljaju političke stranke: A SDA, DNS, DNZ, NS, SBiH, SDP i SNS, javno se ograđuju od nekih odluka, postupaka i istupa vladajuće većine u Vijeću okupljene u neobičnu koaliciju SDA, SNSD, SP, DF i SBB, jer nanose štetu i sramotu našoj općini, te šalju loše poruke javnosti i potencijalnim investitorima.

Kao dosljedna i kredibilna opcija ovoj neprincipijelnoj većini naglašavamo da smo uvijek čvrsto i odlučno stali protiv niza štetnih odluka što su imale za cilj opstrukciju progresa naše općine, iz najnižih i najsitnijih političkih interesa, a koje su između ostalih, nedavno dovele i do blokade rada općine, zbog neusvajanja privremenog finansiranja.

Ovo je bila samo jedna od prvih neshvatljivih odluka, u nizu koje su slijedile.

Naročito ističemo poslednju, koja se tiče „temeljnog preispitivanja svih aktivnosti i ugovornih odnosa sa firmom Arifagić Investment d.o.o.“, koja jasno dokazuje spregu ove vladajuće većine, sa interesnim lobijima koji godinama djeluju na štetu naše općine.

Svoje protivljenje ovoj odluci smo jasno pokazali bojkotom vanredne sjednice održane 9. Februara, na kojoj je ona donesena uz sramni govor mržnje protiv načelnika i najvažnijeg investitora u poljoprivredni sektor u našoj općini.

Ovim još jednom iskazujemo punu podršku svim procesima koji za cilj imaju napredak naše općine i povećanje kvaliteta života u njoj i oštro osuđujemo postupke vladajuće koalicije koja bezočno i dalje ugrožava interese Petrovčana i budućnost naše djece, zarad sitnih političkih interesa uperenih protiv nosioca pozitivnih promjena i dobronamjernih ljudi uposlenih u općini, kao i našeg načelnika.

Nikakve namjerne pravne igrarije i malverzacije ne smiju biti korištene da se tjeraju investitori i mi, iako smo u manjini u Vijeću, nikad nećemo biti uvučeni u takve pokušaje, jer smo tu zbog interesa svih naših građana, za koje ćemo se nastaviti boriti, bez prestanka.

Saglasni vijećnici:

- 1) Prošić Dejan.....
- 2) Dračić Muhamed.....
- 3) Radošević Zdravko.....
- 4) Družić Adnan.....
- 5) Mrđa Marinko.....
- 6) Dragić Dragan.....
- 7) Kecman Duško.....
- 8) Ferizović Izeta.....

U Bosanskom Petrovcu,
04.04.2017.godine

4. redovna sjednica

Dana 9.3.2017. godine u Vijećnici Opštine održan je prvi nastavak 4. redovne sjednice sa početkom u 10 časova.

U nastavku, donesena je Odluka o utvrđivanju javnog interesa za izgradnju elektroenergetskih objekata:

zračni DV 20 (10) kv dionica 5247-T3460 „Medeno Polje 2“ i transformatorske stanice TS 20 (10) 0,4 kv Medeno Polje 2

niskonaponska mreža „Medeno Polje 2“ opština Bosanski Petrovac

Nakon toga, usvojen je zaključak radi preduzimanja preventivnih mjera zabrane nomađenja.

Razmatran je i Izvještaj o radu Organa uprave, sa službama za upravu za 2016. godinu, nakon čega je i usvojen, uz određene dopune. Plan i program rada Opštinskog načelnika i Organa uprave za 2017. godinu vraćen je na doradu, te ide na sljedeću sjednicu.

Izvještaj o stanju u MZ za 2016. i plan i program rada MZ-a za 2017. godinu, vraćen je na doradu, jer određene Mjesne zajednice nisu dostavile svoju dokumentaciju (Krnjeuša i Vođenica).

Izvještaj o radu Javnih preduzeća „Komunalno“ i Veterinarska stanica je usvojen, kao i Javne ustanove „Centar za socijalni rad“.

Pravilnik o unutrašnjoj organizaciji i sistematizaciji radnih mjesta JU „Centar za kulturu i obrazovanje“, nije usvojen, ali je data saglasnost v.d. direktoru da sa

tehničkim realizatorom i kustosom zaključi Ugovor o privremenim i povremenim poslovima.

Dana 13.3.2017. godine, u 13 časova, održan je drugi nastavak sjednice Opštinskog vijeća.

Na samom početku Izvještaj o radu JU „Centar za kulturu i obrazovanje“ za 2016. godinu je primljen k znanju, kao i Informacija o radu svih klubova Sportskog saveza i o utrošku finansijskih sredstava po klubovima za 2016. godinu, te Plan aktivnosti za 2017. godinu.

Doneseni su:

-Program obavljanja usluga zajedničke komunalne potrošnje,

- Program o uređenju javne površine,

- Program o uređenju gradskog građevinskog zemljišta.

Program javne higijene je skinut sa dnevnog reda, kao i Plan ljetnog održavanja puteva za 2017. godinu.

Informacija o implementaciji Odluke o visini naknade za izdavanje u zakup poslovnih zgrada i poslovnih prostorija u svojini Opštine Bosanski Petrovac je primljena k znanju, kao i Informacija o stanju Strategije razvoja i imenovanje tima za reviziju Strategije opštinskog razvoja za period 2016-2020.

Donesen je zaključak o preduzimanju mjera za rješavanje pitanja devastiranih objekata u gradu koji predstavljaju opasnost za građane.

Data je saglasnost na pokretanje postupka za izbor i imenovanje direktora JP „Komunalno“.

Na kraju je primljena k znanju Informacija načelnika o izvršenju zaključka Opštinskog vijeća.



Sjednica Opštinskog vijeća

5. redovna sjednica

Dana 30.3.2017. godine, u Vijećnici naše Opštine održana je 5. redovna sjednica Opštinskog vijeća, sa početkom u 10 časova.

Na samom početku, dnevni red je jednoglasno usvojen. Nakon toga, usvojen je i Izvod iz Zapisnika o radu OV sa 4. redovne i drugog nastavka 3. sjednice, sa određenim primjedbama, te su uslijedila vijećnička pitanja i odgovori.

Razmatrani su i Finansijski izvještaji za 2016. godinu i Planovi i Programi rada, Javnih ustanova i Javnih preduzeća, čiji je osnivač Opštinsko vijeće, te su nakon toga i usvojeni.

Primljena je k znanju i Informacija o radu Zavoda za zapošljavanje, sa Programom rada Zavoda za zapošljavanje za 2017. godinu-Poslovnica Bosanski Petrovac.

Usvojen je i Plan proljetne sjetve, te su primljene k znanju Informacije:

- Korištenje i naplata javnih površina,
- Stanje u poljoprivredi i stočarstvu o podacima iz registra privrednih subjekata-pravnih lica područja Bos. Petrovac (o broju zaposlenih i plaćanju doprinosa).

Potom je usvojen i Izvještaj o radu Komisije za procjenu prometne vrijednosti nekretnina za 2016. godinu.

Informacija o utrošku tekuće rezerve budžeta za 2016. godinu nije usvojena.

Razmatrana je i Informacija o realizaciji zaključaka donesenih na 3. redovnoj sjednici, u okviru koje je usvojeni Zaključak o Izvještaju rada Organa uprave, sa službama za upravu za 2016. godinu, stavljen van snage, a skinuta je i tačka koja se odnosi na upoznavanje sa Rješenjem Centralne izborne komisije.

Primljena je k znanju Informacija Službe za stambeno komunalnu djelatnost, vodoprivredu i zaštitu okoliša i preduzeća „Komunalno“, kao i informacija o analizi potraživanja i obaveza opštine sa pregledom stanja i obaveza prema dobavljačima, sa posebnim osvrtom na kratkoročne obaveze.

Usvojeni su:

- Program obavljanja usluga zajedničke komunalne potrošnje, za 2017. godinu
- Program javne higijene za 2017. godinu
- Program uređenja javnih površina za 2017. godinu
- Plan ljetnog održavanja puteva za 2017. Godinu

Donesena je Odluka o utvrđivanju prosječne konačne građevinske cijene iz prethodne godine 1 korisne stambene površine na području opštine Bosanski Petrovac , te je usvojen prijedlog.

Odluke o izmjenama i dopunama Odluke o davanju u zakup poljoprivrednog zemljišta u državnom vlasništvu na području naše Opštine.Data je saglasnost na prijedlog

direktora i uposlenika JU „Centar za kulturu i obrazovanje“ na povećanje osnovice za obračun plate, kao i na saglasnost na prijedlog cijena privremenog nadzornog odbora d.o.o. „Komunalno“ za komunalne i uslužne djelatnosti.

Donesena je i Odluka o tonskom snimanju sjednica radnih tijela, te je i preispitivan zaključak donesen na 4. vanrednoj sjednici Opštinskog vijeća.

CIK odbio dati saglasnost na razrješenje općinske izborne komisije

Ured za reviziju institucija FBiH odbio izvršiti reviziju poslovanja općine Bosanski Petrovac

Svjedoci smo kako je u posljednje vrijeme naša općina prestala biti izvor dobrih vijesti zahvaljujući djelovanju destruktivne većine u općinskom vijeću okupljene u neprincipijelnu koaliciju koju čine „prirodni saveznici“ SDA, SBB, SNSD, SP i Demokratska fronta Željko Komšić. Nakon što smo prije nekoliko mjeseci ušli u istoriju kao jedina općina koja je funkcionisala bez budžeta i odluke o privremenom finansiranju i nakon što smo izvrgnuti negativnom publicitetu zbog sramnog odnosa prema najvažnijem investitoru, uslijedile su i nove čuške našem općinskom vijeću od strane relevantnih institucija ove države.

Naime, na svojoj posljednjoj sjednici je Centralna izborna komisija BiH odbila dati saglasnost za razrješenje naše Općinske izborne komisije (OIK) u sastavu Slobodanka Kecman, Adisa Eminoglu i Dragana Manojlović. Ovim je osujećen pokušaj stavljanja OIK pod političku kontrolu neprincipijelne „Semafor koalicije“ i upropaštavanja jednog općinskog organa koji je svoj posao radio besprijekorno.

Iako je komisija u ovom sastavu provela prošle izbore besprijekorno i još uz uštede unutar skromnog budžeta, razlog za pokušaj njenog razrješenja je većina u vijeću našla u polnoj strukturi OIK. U doba kada sav svijet teži povećanoj zastupljenosti žena na svim pozicijama, Općinsko vijeće Bosanskog Petrovca je jedino koje je našlo za sporno to da tri žene rade dobar posao. Naravno, Centralna izborna komisija je ovo razrješenje glatko odbila i time spriječila pokušaj da se OIK stavi u službu manipulacija na idućim izborima putem lažne brige za polnu ravnopravnost.

Osim ovoga, novo poniženje koje je sebi OV dozvolilo je došlo u vidu dopisa Ureda za reviziju institucija FBiH koje je odbilo zaključak vijeća kojim se traži revizija finansijskog poslovanja Jedinstvenog organa uprave Bosanski Petrovac. U dopisu Ureda za reviziju stoji kako ova institucija ima svoj raspored rada koji ne predviđa reviziju u općini Bosanski Petrovac, te kako općinsko vijeće nije nadležno da od njih bilo šta traži. Općinski pravници su više puta upozorili kako vijeće izlazi iz okvira svoje nadležnosti i svojim neznanjem sramoti općinu pred institucijama viših nivoa ali to nikad nije dovoljno da vijeće sebe i naše građane poštedi blamaže.

Tako je bilo i nedavno kad je odluku vijeća o smanjenju koeficijenta plate općinskog načelnika Kantonalni sud stavio

van snage budući da je taj koeficijent definisan federalnim i kantonalnim propisima koji regulišu tu oblast i vijeće ne može određivati koeficijent niži od zakonom propisanog. Na sve ove greške u procedurama i izlascima iz zakonskog okvira rada vijeća vijećnici aktuelne većine su blagovremeno i višestruko upozoravani ali ih to nije spriječilo da svojim ignorantskim odnosom nanose sramotu i štetu općini vođeni isključivo sitnim političkim interesima.

Očito je, dakle, da kršenje zakona, propisa i procedura aktuelnoj većini ne predstavlja nikakav problem i da su jedine situacije u kojima će se potruditi da ispoštuju sve moguće i nemoguće procedure one u kojoj te procedure idu na ruku kriminogenim lobijima a usporavaju i tjeraju investitore koji dolaze u našu općinu. Na sreću, postoje institucije viših nivoa vlasti koje su kao u ovih nekoliko slučajeva razotkrile svu intelektualnu i stručnu ograničenost „Semafor devetke“ a pitanje je samo koliko će takvih slučajeva biti tokom čitavog mandata kad je ova koalicija uspjela prirediti ovoliko blamaža u samo tri-četiri mjeseca.

Dolazak novih 100 grla na „Fanu-Arifagić“

U Krnjeušu je 2.marta, na farmu Fana-Arifagić stigao novi kontingent od 100 grla norveških crvenih goveda. Ovim se nastavlja preseljavanje značajnog broja krava iz Kozarca u Bosanski Petrovac.

Trenutno „Fana-Arifagić“, broji ukupno 250 grla, a prema riječima zamjenika direktora Jusufa Arifagića, Almira Hodžića, planiraju se još veća proširenja proizvodnje u narednom periodu.

„Ovo je treći kontingent grla koji je došao na ovu farmu, do sada smo transportovali 150 grla. Danas već ima 250 grla. Sva ova grla su proizvedena u Kozarcu, u našoj matičnoj farmi. U Kozarcu imamo proizvodnju, a ovdje planiramo tov stoke. Plan nam je da do kraja aprila transportujemo novih 100 grla. Mi ćemo razvijati ovaj projekat, a elektrifikaciju hala privodimo kraju. Što se tiče hrane, to smo obezbijedili većinom iz Kozarca, ključno je i potreba da se hrana proizvodi na petrovačkim poljima“

Uprkos otežavanju poslovanja, načelnik Zlatko Hujčić je svojim prisustvom pratio transport grla, koji ne znače uspjeh samo za Arifagića, nego iznad svega i za našu Opštinu:

„Postoje opstrukcije od strane Opštinskog vijeća, koji vide negativno u dolasku novih investitora, iako im oni sa svakim novim zaposlenim čovjekom iz Bosanskog Petrovca dokazuju suprotno. Ovdje imamo dobre ljude, dobru volju. Idemo mi dalje. Gospodin Jusuf Arifagić je dobrodošao ovdje, u ovu opštinu, po svim mogućim kriterijima ljudskosti i poslovnosti on je prvi. Mi ćemo uspjeti da ova polja budu aktivirana, tim što više, što postoji Zaključak Vlade Kantona koji nas na to praktično i obavezuje.“

Razgovarali smo i sa radnikom „Fane-Arifagić“, Duškom Mandićem, iz Krnjeuše, koji ističe da je više nego zadovoljan poslom koji obavlja: „Nastanjen sam u Risovcu, 7 mjeseci radim kod gospodina Jusufa, i prije sam se bavio stokom, tako da mi posao nije stran. Više sam nego zadovoljan, treba biti realan

u današnje vrijeme. Trenutno nas je 3 radnika, a razlog što su ostali dali otkaz ne bih htio da komentarišem. Jednostavno nisu bili spremni na odgovornost i rad.“



Načelnik Hujčić sa zamjenikom direktora Jusufom Arifagićem

Dan nezavisnosti Bugarske

U Sarajevu, u hotelu „Holiday“, 6.marta, ambasador Bugarske u BiH, Avgustina Cvetkova Karabaševa, organizovala je svečani prijem povodom Nacionalnog praznika Bugarske 3. marta-Dana nezavisnosti.

Bugarska je članica Evropske unije, a podsjetimo i na činjenicu da je ova prijateljska zemlja, prva zvanično priznala Bosnu i Hercegovinu, prije 25 godina.

Karabaševa je izrazila uvjerenje da će Bugarska nastaviti da pruža pomoć BiH na njenom reformskom putu.

Prijemu u sarajevskom hotelu, pored brojnih predstavnika javnog i političkog života i diplomatskog kora u BiH, po službenom pozivu prisustvovao je i načelnik Opštine Bosanski Petrovac, Zlatko Hujčić.



Načelnici Bosanskog Petrovca (Z.Hujčić) i Zenice (F. Kasumović), sa ambasadoricom Bugarske (Avgustina Cvetkova Karabaševa)

Kolegij načelnika USK-a

Dana, 9.marta, načelnici sedam općina USK-a su održali svoj drugi mjesečni kolegij u Cazinu.

Problemi lokalnih zajednica i zajedničke aktivnosti na njihovom rješavanju i ovaj put su bili na dnevnom redu kolegija načelnika.

Bitna tema je upravljanje regionalnom deponijom. Ohrabrujuća činjenica jeste opredijeljenost svih sedam

općina i načelnika za ovaj koncept zajedničkog djelovanja u najvećoj mogućoj mjeri.

Mišljenje načelnika je da lokalne zajednice moraju biti uključene u planiranje javnih projekata i njihovu realizaciju.

Također je važno da projekti lokalnih zajednica budu podržani od svih nivoa vlasti, kada se zajednički definišu i osmisle, na lokalnom nivou.

Uspješne lokalne zajednice, garant su i uspješnog kantona, odnosno cijele regije, zaključeno je na kolegiju.

Naredni sastanak je zakazan za početak aprila u Bosanskoj Krupi, kada će načelnici razgovarati o realizaciji utvrđenih daljih aktivnosti svojih općina.



Načelnici USK-a

Podrška načelniku Hujiću

Dana, 28.marta, nezavisni načelnici održali su sastanak, na kome su uputili poruku u povodu slučaja iz Bosanskog Petrovca i povlačenja investitora Arifagić Investment d.o.o. , tražeći zaštitu investitora i omogućavanje njihovog poslovanja, čime bi se spriječio njihov odlazak i osigurali uslovi za nove investicije.

Ibrahim Hadžibajrić, Amra Babić, Zlatko Hujić i Sead Džafić, nezavisni načelnici, sa sastanka u Sarajevu zatražili su zaštitu javne imovine i javnog dobra te omogućavanje općinskim načelnicima i službama da upravljaju tom društvenom imovinom na način da od nje ima koristi.

Podsjećamo, kompanija Arifagić Investment d.o.o. koja je u Bosanskom Petrovcu prije dvije godine ostvarila pravo na zakup poljoprivrednog zemljišta na lokaciji Oraško brdo i planirala napraviti modernu farmu norveških goveda, prekinula je svaki oblik saradnje sa našom Općinom, te odustala od izgradnje moderne farme norveških goveda.

Inače, Kompanija Arifagić Investment do sada je uložila milion KM u našu Općinu, zaposlila dio lokalnog stanovništva, a imala je plan da u ovoj godini uloži značajna sredstva i u potpunosti obnovi farmu FANA i popuni je s 800 grla, zaposli oko 50 radnika i pokrene proizvodnju.



Nezavisni načelnici

Šemsudin Dedić na farmi „Fana-Arifagić“

Dana, 31.marta, Šemsudin Dedić, federalni ministar, poljoprivrede, vodoprivrede i šumarstva, zajedno sa načelnikom Zlatkom Hujićem i Jusufom Arifagićem obavio je razgovor na farmi „Fana-Arifagić“ u Krenjuši, u Bosanskom Petrovcu.

Razlog posjete je aktuelna problematika sa kojom se susreće investitor koji je prije dvije godine došao na područje naše Opštine.

Ovu priliku načelnik Hujić i vlasnik kompanije Arifagić Investment iskoristili su da upoznaju ministra Dedića sa razlozima raskidanja ugovora i prestanka svih aktivnosti kompanije na području naše Opštine.

„Arifagić je donio odluku. Kod njega nema komisija, zaključaka, vijeća. On je odlučio da sve povlači iz naše Opštine. Međutim, imali smo priliku prvi put razgovarati sa ministrom Dedićem, i mislim da ovaj dolazak predstavlja posljednju šansu, ja hoću da vjerujem da je tako. Cijelom kraju i regionu treba jedan ovakav investitor“, istakao je načelnik Hujić.

I Jusuf Arifagić je istakao pozitivan gest u vidu dolaska ministra na farmu „Fana-Arifagić“:

„Bitno je da je gospodin ministar upoznat sa svim ovim i siguran sam da će on to prenijeti dalje kao vrhovnim institucijama države. Sve ovisi od reakcije, da li će profunkcionisati pravna država ili će pojedinci biti država. Moja odluka stoji. Postoje tri stvari koje je vrlo bitno riješiti: neko mora snositi političku odgovornost za novonastalu situaciju, kako grla prehraniti, i krivična odgovornost koju ću pokrenuti protiv nekih ljudi kojima nije ništa sveto. Trebamo se okrenuti budućnosti, i razmišljati da sva ona naša rođena i nerođena bosnaskohercegovačka djeca trebaju živjeti i ostati na ovom području. To nam treba biti zvijezda vodilja i cilj“.

Federalni ministar, Šemsudin Dedić, nakon razgovora, je uputio podršku, te se obavezao iznaći rješenje za ovu problematiku:

„Investicije ove vrste su svakako potrebne Opštini Bosanski Petrovac, Unsko-sanskom kantonu, ali i državi Bosni i Hercegovini. Kada je u pitanju problematika, kompletan predmet sam uputio Federalnoj upravi za inspeksijske poslove da utvrdi nadležnost za rješavanje. Mi generalno imamo problem u Zakonu o poljoprivrednom zemljištu. Zakazat ću sastanak načelnika, Kantonalnog ministarstva poljoprivrede, premijera i vijećnika. Ne smije niko slati poruku da investicije, pogotovo poljoprivredne, ne mogu imati ambijent za svoje djelatnosti. Po onome što sam vidio, planovi Arifagić Investment su ozbiljni, u Bosanskoj Krupi nismo imali problema, jednoglasno mu je data saglasnost.“



Na farmi „Fana-Arifagić“

Podrška lokalnim partnerstvima za zapošljavanje u BiH

Dana, 27. marta u Sarajevu je održana dodjela certifikata o grantovima u sklopu projekta "Lokalna partnerstva za zapošljavanje" kojeg finansira EU. Grantove u iznosu od 3 miliona eura dobilo je 15 novoosnovanih lokalnih partnerstava za zapošljavanje koja će u naredne dvije godine biti odgovorna za povećanje zapošljivosti.

Opšti cilj mu je doprinjeti stvaranju održivih izvora prihoda od poljoprivrede za stanovništvo projektom obuhvaćenih opština, a to su Drvar, Istočni Drvar, Ključ, Ribnik, Bosanski Petrovac i Petrovac, a kao krajnji cilj ima razviti lanac vrijednosti u proizvodnji, preradi i distribuciji lana na području šest izabranih opština i omogućiti trajno zaposlenje za najmanje šesdeset poljoprivrednih proizvođača.

Važno je istaći da je od 157 poslatih aplikacija naša aplikacija ušla među 15 za finansiranje, a jedina je od petnaest koje se finansiraju, a da u sebi uključuje i međuentitetsku i međuopštinsku saradnju, s obzirom da je Opština Petrovac nosilac, a naša Opština partner na projektu, čija je vrijednost 200.000 eura.

Projekat "Podrška lokalnim partnerstvima za zapošljavanje u Bosni i Hercegovini" (LEP) pokrenut je u martu 2016. godine sa ciljem da doprinese strateškom razvoju tržišta rada u zemlji putem razvoja održivih partnerstava na lokalnom nivou sposobnih da provedu aktivne mjere na tržištu rada i da stvore nova radna mjesta za socijalno ugrožene osobe.

Ambasador Švedske Anders Hagelberg u posjeti našoj Opštini

Dana, 16. marta u kabinetu načelnika Hujića upriličen je prijem za predstavnike švedske ambasade, na čelu sa ambasadorom Kraljevine Švedske gospodinom Andersom Hagelbergom.

Razgovaralo se o projektima koji se realiziraju u našoj Opštini u kojima je učestvovala Švedska vlada preko razvojne agencije SIDA, kao i o nekim od budućih projekata, te o trenutnoj situaciji i aktuelnim problemima sa kojima se susreće naša Opština.

„Sa načelnikom Hujićem smo imali zaista kontruktivan i interesantan dijalog. Jedno od pitanja o kojem smo razgovarali je pomoć Švedske Opštini Bosanski Petrovac u izgradnji sistema pročišćavanja otpadnih voda za koji smo spremni da izdvojimo 800.000 eura, što će se veoma pozitivno odraziti na održivi razvoj ove Opštine. Mi smo, također, razgovarali

i o mogućnostima za investicije. Kao važan sektor spomenuli smo poljoprivredni sektor, gdje sam naglasio da već postoje dobri primjeri, a to je investitor koji je došao iz Norveške, siguran sam da će predstavnici Opštine stvoriti najbolje moguće uslove da se taj investitor i dalje razvija. Razgovarali smo dalje o stanju šuma, gdje sam izrazio svoju zabrinutost. Rješenje je naravno da se donese dobar zakonski okvir. Našu ćemo saradnju svakako i nastaviti“, završio je ambasador Švedske.

Načelnik Hujić se zahvalio na dolasku, kao i na interesovanju i dobrom poznavanju stanja u našoj Opštini. Posebno je izražena zahvalnost za finasijsku podršku izgradnje postrojenja za prečišćavanje otpadnih voda, kao i njihovu podršku u aktivnostima donošenja Zakona o šumama Federacije BiH, odnosno izvršenja presude Ustavnog suda, u korist Opštine Bosanski Petrovac.

Sastanku su prisustovale i gospođa Marie Bergström i gospođa Ajša, ispred SIDA, švedske agencije za razvoj zemalja jugoistočne Evrope.



Načelnik Hujić sa predstavnicima švedske ambasade

Zajednička izjava

Načelnici opština Drvara, Goran Broćeta, Bosanskog Grahova, Duško Radun, i Glamoča, Radovan Marković, te predstavnici naše Opštine umjesto načelnika, Esmir Brković i Nevsad Ramić, su 23. marta, na sastanku koji se održao u Kabinetu načelnika Hujića razgovarali o Presudi Ustavnog suda Federacije Bosne i Hercegovine kojom je utvrđeno da je Zakonom o šumama USK povrijeđeno pravo naše Opštine na lokalnu samoupravu.

Inicijator ovog sastanka je Mile Marčeta, Poslanik Skupštine Kantona 10 i delegat Doma naroda Parlamenta FBiH.

Učesnici sastanka potpisali su danas zajedničku izjavu, u kojoj se navodi da ponašanje Unsko-sanskog kantona u pogledu izvršenja Presude i mjenjanja Zakona o šuma, nije prihvatljivo. Potpisnici izražavaju žaljenje

zbog takvog ponašanja zakonodavne vlasti Unsko-sanskog kantona koje je slično ponašanju iste vlasti i u Livanjskom kantonu 10, te podržavaju načelnika naše Opštine u namjeri da se izvrši navedena Presuda u cjelosti, koristeći sva zakonom dopuštena sredstva u borbi za prava lokalne zajednice sadržana i definisana Ustavom FBiH.

Potpuna implementacija Presude Ustavnog suda FBiH i njeno izvršenje je od životne važnosti za ove četiri opštine, koje su nerazvijene, povratničke, u kojima kvalitet života u dobrom dijelu zavisi od izvršenja Presude.

„Današnji sastanak je imao svrhu da vidimo šta činiti sa Zakonom koji je u Nacrtu i Javnoj raspravi. Zadovoljstvo mi je kao čovjeku koji i dalje ima namjeru da se bori za status ovih povratničkih opština da se donese kvalitetan Zakon. Odgovornost će snositi oni koji ne poštuju Presudu Ustavnog suda. Ako se status ne popravi ove opštine će morati donositi neke mjere, a sve to u skladu sa Zakonom. Moraju se poštovati ljudska prava i Zakon o lokalnoj samoupravi. Pratit ćemo dalji razvoj situacije“, rekao je Mile Marčeta.

Sljedeći sastanak će se održati u Drvaru, na kojem će prisustvovati i predobranici navedenih opština kako bi i oni zajedničkim rješenjem dali pravni pokazatelj za dalji razvoj situacije.

Zenica...

Dan Grada

Na svečanoj sjednici Gradskog vijeća Zenice, povodom 20. marta, dana grada Zenice, pored velikog broja zvanica iz kulturnog, političkog i vjerskog života, prisustvovao je i načelnik naše Opštine, Zlatko Hujić.

Program obilježavanja je počeo u 10 sati, tokom kojeg je bila upriličena podjela javnih priznanja, obraćanje Gradonačelnika Fuada Kasumovića, a potom i Svečano otvaranje 22. Međunarodne kulturne manifestacije „Zeničko proljeće“.

Čestitajući praznik Zenice, Gradonačelniku Kasumoviću i građanima Zenice, načelnik Hujić se zahvalio na pozivu, te je ovu priliku iskoristio na jačanju saradnje i zajedničkog djelovanja u podsticanju razvoja i unapređivanja naših lokalnih zajednica.

6. put tradicionalno...

Veče Petrovčana u Beogradu

Dana, 25. marta, u večernjim satima, u prepunoj sali restorana „Grand Ada“ u Beogradu, u organizaciji Udruženja Petrovčana u Beogradu, održano je šesto tradicionalno veče Petrovčana.


Domaćin sijela, predsjednik Udruženja Boro Banjac je i ovom prilikom podsjetio na važnost održavanja ovakvih skupova, te se u svom obraćanju zahvalio svim prisutnim na dolasku i uveličavanju ovogodišnjeg druženja.

Veče je svojim prisustvom uveličala i delegacija iz naše Opštine, na čelu sa načelnikom Zlatkom Hujićem, koji je ovu priliku iskoristio da održi i niz korisnih razgovora sa ljudima porijeklom iz našeg kraja.

Pjesma je odzvanjala do sitnih sati, a Petrovčani su sa velikim interesovanjem listali mjesečni bilten naše Opštine.



Atmosfera tokom druženja

BOSNA I HERCEGOVINA FEDERACIJA BOSNE I HERCEGOVINE UNSKO-SANSKI KANTON OPĆINA BOSANSKI PETROVAC OPĆINSKI NAČELNIK		БОСНА И ХЕРЦЕГОВИНА ФЕДЕРАЦИЈА БОСНЕ И ХЕРЦЕГОВИНЕ УНСКО-САНСКИ КАНТОН ОПШТИНА БОСАНСКИ ПЕТРОВАЦ ОПШТИНСКИ НАЧЕЛНИК
Broj: 01-26-680-1/2017. Datum: 23. marta 2017. godine		
Načelnici opština Bosanski Petrovac g. Zlatko Hujić, opštine Drvar g. Goran Bročeta, opštine Bosansko Grahovo g. Duško Radun, opštine Glamoč Radovan Marković na zajedničkom sastanku u Kabinetu načelnika opštine Bosanski Petrovac, razgovarajući o Presudi Ustavnog suda Federacije Bosne i Hercegovine, broj U-8/14, („Službene novine FBiH“, broj 26/16.) kojom je utvrđeno od strane tog suda da je Zakonom o šumama USK („Službeni glasnik USK“, broj 22/12.) povrijeđeno pravo opštine Bosanski Petrovac na lokalnu samoupravu i kojom Presudom je naloženo Unsko-sanskom kantonu da Zakon o šumama uskladi sa ovom Presudom, utvrđuju i daju sljedeću		
ZAJEDNIČKU IZJAVU		
Analizirajući ponašanje Unsko-sanskog kantona u pogledu izvršenja Presude U-8/14, načelnici gore navedenih opština su mišljenja da Unsko-sanski kanton, odnosno Skupština Unsko-sanskog kantona nije u cjelosti izvršila Presudu Ustavnog suda FBiH, broj U-8/14, odnosno da je svoj Zakon o šumama izmijenila sitnim kozetičkim promjenama, a da suštinski izvršenje presude nije ni obtačnuto.		
Načelnici ovih opština izražavaju žaljenje zbog takvog ponašanja zakonodavne vlasti Unsko-sanskog kantona koje je slično ponašanju iste vlasti u Livanjskom kantonu 10. Gdje se na teritoriji dole pomenutih opština nalazi 90% šumskog bogatstva u kantonu 10, te podržavaju načelnika opštine Bosanski Petrovac da u namjeri da se izvrši navedena presuda u cjelosti, iskoristi sva zakonom dopuštena sredstva u borbi za prava lokalne zajednice sadržana i definisana Ustavom FBiH.		
Potpuna implementacija Presude ustavnog suda FBiH i njeno izvršenje je od životne važnosti za ove četiri opštine, koje su nerazvijene opštine, povratničke opštine u kojima povratak stanovništa u dobrom dijelu zavisi od izvršenja gornje presude. Ujedno se ovom izjavom podsjećaju na stavove Saveza opština i gradova FBiH po ovom pitanju, te je potrebno da se isti ispoštuju.		
Opština Drvar, Načelnik Goran Bročeta	Opština Glamoč, Načelnik Radovan Marković	Opština Bos. Grahovo, Načelnik Duško Radun
Opština Bosanski Petrovac, Načelnik Zlatko Hujić		
Dostavljenb: 1. Premijer FBiH, 3. Međunarodnim institucijama u BiH 2. Ministar PVIŠ FBiH 4. mediji 5. a/a		
Bosanska 110, 77250 Bosanski Petrovac, +38797883570, www.bosanski-petrovac.gov.ba, opcnabp@bih.net.ba		

Moja priča

Dana 20. marta, u Vijećnici naše Opštine sa početkom u 12:30 sati, održana je tribina u okviru projekta PRO-Budućnost pod nazivom „Moja priča“.

Riječ je o razgovoru o sukobima 1992-1995. godine u BiH iz drugog ugla i sa drugačijom perspektivom. Tokom sat i po vremena tri osobe, žrtve rata, iz sva tri naroda, javno su govorili o svojim iskustvima doživljenim u ratu, a u cilju poticanja šire kulture pomirenja.

Da rat donosi samo bol, patnju i posljedice do kraja života, naglasili su tokom razgovora predstavnici tri naroda Zdenko Šupuković iz Žepča, Amir Omerspahić iz Sarajeva i Goran Dragojević iz Prijedora.

Prisutni građani naše Opštine otvoreno su razgovarali o svojim iskustvima s početka devedesetih godina, kao i o trenutnoj socijalno-političkoj situaciji u Bosni i Hercegovini.

Između ostalog, složili su se da je potrebno razgovarati o ovim temama kao i to da mladi ljudi imaju obavezu prema svojoj budućnosti aktivno se uključiti u procese izgradnje mira.



Uvodničari: Goran Dragojević, Amir Omerspahić i Zdenko Šupuković (s lijeva na desno)

Otvoren novi poziv u sklopu Omladinske banke

Dana 2.3.2017. godine je otvoren novi poziv za društveno inovativne projekte u sklopu programa Omladinske banke.

Članice i članovi odbora Omladinske banke Bosanski Petrovac održali su 6. marta, prvu prezentaciju ovog Programa, te tom prilikom pozvali naše mlade ljude da problem u svojoj zajednici krenu rješavati na inovativan način.

Pored ovoga, Program omogućava mladima da razvijaju 7 ključnih kompetencija: menadžment, vođenje, timski rad, kritičko mišljenje, komunikaciju, kreativno mišljenje i poslovnu sposobnost.

Ovo je prva u nizu prezentacija, te će ih u skorom periodu biti održano još, gdje učešće mogu uzeti svi mladi ljudi iz naše Opštine.

Podsjećamo, da je naša Opština obnovila Memorandum o saradnji sa Fondacijom Mozaik u novembru prošle godine.

U Bosanskom Petrovcu u periodu od 2012 do 2016. godine, kroz program Omladinske banke realizovan je 31 projekat, ukupne vrijednosti 93.739 KM.



Prezentacija u Vijećnici...

Pozdrav proljeću

Mališani „Dječijeg vrtića“, obučeni u odore proljetnih nijansi, 21. marta su u sklopu tradicionalne manifestacije „Pozdrav proljeću“ obavili defile ulicama našeg grada.

Nesvakidašnje šeširiće, proljetne raznobojne maske cvijeća, za ovu priliku je „vesela povorka“ napravila i ponosno nosila.

Cilj ovakvih aktivnosti je da najmlađi pokažu šta znaju o ovom godišnjem dobu, da iskažu svoju kreativnost i sposobnost, a istovremeno da upoznaju i nauče sve ono što proljeće sa sobom donosi.



Mališani u šetnji...

Izgradnja nove zgrade

Napreduju radovi

Radovi na izgradnji zgrade od 20 stanova koja je namijenjena za trajno stambeno zbrinjavanje izbjeglih i raseljenih osoba, uveliko napreduju.

Dinamika izvođenja radova je u skladu sa planiranom, a u toku su aktivnosti oko izlijevanja ploče.

Napominjemo da je riječ o projektu koji se implementira u sklopu Državnog projekta stambenog zbrinjavanja BiH3.

Cilj je pomoći ugroženim izbjeglim i raseljenim osobama u iznalaženju rješenja za socijalne izazove s kojima se suočavaju.

Planirano je da radovi traju oko 300 dana, a na taj način će biti trajno stambeno zbrinuto 20 porodica, s obzirom na to da će nakon izradnje zgrada biti predata u vlasništvo Opštine Bosanski Petrovac.

Vrijednost projekta je 950 hiljada KM, a za izgradnju objekta Opština je osigurala 13 % sredstava od ukupne vrijednosti, za zemljište, građevinsku dozvolu, revidiranu projektnu dokumentaciju, priključke struje i vode, kanalizaciju, te pristupni put.



Na gradilištu...

Trst: XIII Međunarodni konkurs poezije „Castello di Duino“

Međunarodni konkurs poezije „Castello di Duino“ objavljen je u oktobru 2016. godine na stranici Federalnog Ministarstva obrazovanja i nauke. Pravo učešća su imali mladi iz svih država svijeta do 30 godina starosti. Djeca do 16 godina svrstana su u kategoriju pod nazivom „Giovanissimi“.

Učenica Osnovne škole „Ahmet Hromadžić“ iz Bosanskog Petrovca, Nedžma Jaganjac, učestvovala je na ovom takmičenju pjesmom „Željela bih...“ , zajedno sa svojom nastavnicom, mentorom Hafijom Subašić.

Od strane stručnog žirija, pjesma je nagrađena u kategoriji do 16 godina- GIOVANISSIMI.

Ovakvom nagradom Nedžma je predstavila Bosnu i Hercegovinu i svoj grad, Bosanski Petrovac u Trstu.

Prisustvo tako važnom i svečanom činu, omogućila je Općina Bosanski Petrovac, njen načelnik gosp. Zlatko Hujić. Sa Nedžmom su u pratnji bili načelnik Općine Bosanski Petrovac, direktorica Osnovne škole „Ahmet Hromadžić“,

gđa. Mujesira Kavaz i nastavnica Hafija Subašić, Nedžmin mentor.

Nedžma je pročitala pjesmu „Željela bih“ pred publikom na svom bosanskom jeziku, a organizator manifestacije „Castello di Duino“ na italijanskom jeziku. Kao nagradu Nedžma je dobila pehar i diplomu.

Čestitke Nedžmi Jaganjac i puno sreće u budućem radu i stvaralaštvu.



Nastavnica Hafija Subašić, učenica Nedžma Jaganjac i direktorica Mujesira Kavaz

Obavještenje

Obavještavaju se građani Opštine Bosanski Petrovac da je 6.4.2017. godine tema emisije „Zabranjeni forum“ koja se prikazuje na televiziji PINK BiH bila „Zašto bh politika ne voli domaće investitore“.

Razlog teme emisije je odlazak investitora Arifagić Investment sa područja naše Opštine.

Pored Svetlane Cenić, direktorice regionalnog projekta „Biznis plus“, Jasmine Dževlan, portparola

FIPA-e, Jusufa Arifagića, vlasnika kompanije Arifagić Investment, Ermina Cere, člana Predsjedništva DF-a, i Vijeća za ekonomsku politiku i strategiju, Nenada Vukovića, Gradonačelnika Istočnog Sarajeva i člana predsjedništva partije Demokratskog progresa, Tomislava Majića, predsjednika Udruženja za poduzetništvo LINK Mostar, gost emisije bio je i načelnik naše Opštine, Zlatko Hujčić.

Link za gledanje 536. emisije „Zabranjenog foruma“ možete naći na službenoj stranici naše Opštine www.bosanskipetrovac.gov.ba.



Iz studija...



Na farmi „Fana-Arifagić“



foto Hare

Bosanskopetrovačko Bolića kolo...



Oštrej...

Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

Slušajte Radio Bosanski
Petrovac od 15:00-17:00,
svakim danom na 90.9 MHz fm